

Kalaallit Nunaanni Namminersorlutik Oqartussanit uuma akuerineqarnissaa pillugu Inatsisartut aalajangiiffigisassaattut siunnersuut: Nunani allamiut pillugit inatsisip allannguutaa pillugu inatsisit assigiinngitsut ilaannik Kalaallit Nunaannut atuutilersitsineq pillugu peqqussummut siunnersuut (Kalaallit Nunaanni najugaqarsinnaanermut suliat suliarineqarnerinut akiliut pillugu malittarisassanik atulersitsineq, sivisunerusumik najugaqarsinnaanermut visumimik atuutilersitsineq, Schengeninformationssystem (SIS)-mik atuineq, killeqarfinnik avasinnerusunik il.il. nakkutilliinerup sunniuteqarluarnissaanik pitsannngorsaaneq siunertaralugu Schengenimut malittarisassanik naammassisaqarneq siunertaralugit, nunamut isertitsisinnaatitaannginneq pillugu aalajangiinermut aamma nunamiit aallarnissamut piffissaliussat pillugit malittarisassanik allanngvineq)

*Isumaginninnermut, Suliffeqarnermut, Ilaqutariinnut Nunamullu Namminermut
Naalakkersuisumit saqqummiunneqartoq*

pillugu

Inatsisinut Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini uku inuttarai:

Inatsisartunut ilaasortaq Aqqalu C. Jerimiassen, Atassut, siulittaasoq
Inatsisartunut ilaasortaq Kuno Fencker, Naleraq, siulittaasup tullia
Inatsisartunut ilaasortaq Karen-Marie Kyed Frederiksen, Demokraatit
Inatsisartunut ilaasortaq Bo Martinsen, Demokraatit
Inatsisartunut ilaasortaq Nivi Rosing, Inuit Ataqtigiit

UPA2026-mi 5. maj 2026 siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

EU-mi peqqussutini aaqquissuussinerit malittarisassallu attuumassutillit Schengenimi suleqatigiinermut killeqarfinnillu nakkutilliinermut annertuumik pingaarutillit atorneqarsinnaalernissaat atuuttunngortissinnaanissaallu siunnersuummi siunertarineqarpoq.

Peqqussutip akuerineqarneratigut Naalagaaffeqatigiinnermi nunanut allanut suliassaqarfimmi malittarisassat assigiissarneqassapput, tamannalu nunanut allanut suliassaqarfiup killeqarfinillu nakkutilliinerup assigiiaarnerusumik sunniuteqarluarnerusumillu aqutsivigineqalernissaannut peqataaqataassasoq naatsorsuutigineqarpoq.

Siunnersuutip Inatsisartunit siullermeerneqarnera

Siunnersuut siullermeerneqarami tapersorsorluarneqarpoq, taamaalillunilu siunnersuutip imarisai akerlilerneqarnatik.

Suliassaqarfimmi nakkutilliinerup siunnersuutikkut nukittorsarneqarnissaa iluarisimaarneqartoq oqaatigineqarpoq.

Siunnersuutip aningaasaqarnikkut kingunerisassai

Aalajangiiffigisassatut siunnersuutit piviusunngortinneqarneranni aningaasaqarnikkut allaffis-sornikkullu kingunerisassat siunnersuutip tunngavilersuutitaani nassuiaatigineqartassat Inatsisartut suleriaasianni § 33, imm. 1-imi allassimavoq.

Siunnersuut suliassaqarfimmut danskinit oqartussaaffigineqartumut attuumassuteqarmat Nunatta Karsianut aningaasaqarnikkut kingunerisassat allaaserineqarsimangitsut ataatsimiititaliamit maluginiarneqarpoq.

Ataatsimiititaliap siunnersuummut oqaaseqaatai

Qulequttanik ataatsimiititaliamit immikkut paasinarsisinneqartussatut kissaatigineqartunik siunnersuummik siullermeerinninnermi oqaatigisaqartoqanngitsoq ataatsimiititaliamit maluginiarneqarpoq.

Ataatsimiititaliamit naggasiullugu oqaatigineqassaaq siunnersuut siullermeerneqarnermi annertuumik taperserineqarmat.

Ataatsimiititaliap inassuteqaatai

- Ataatsimiititaliap isumaqatigiittup siunnersuut akuerineqassasoq inassutigaa.

Tamatuma peqatigisaanik peqqussutip atuutilersinneqarnissaata ingerlanera pillugu Inatsisartunut ingerlaavartumik ilisimatitsisaqqullugit Naalakkersuisut ataatsimiititaliamit kaammattorneqarput.

Ataatsimiititaliap taama oqaaseqaateqarluni isumaliutissiisummilu allassimasutut paasinnil-
luni siunnersuut aappassaaniigassanngortippaa.

Aqqalu C. Jerimiassen
Siulittaasoq

Kuno Fencker
Siulittaasup tullia

Karen Marie K. Frederiksen

Bo Martinsen

Nivi Rosing